

中國地方志集成

雲南府縣志輯 ⑦③

民國大理縣志稿(二)

鳳凰出版社●上海書店●巴蜀書社

太和縣志稿卷之三

建設部

夫蛛晴而網蟻雨而封物力建設之明證也架木爲巢結繩爲罟人事建設之造端也天壤無無建設之國家古今無無建設之時代舉凡籌備國防脩明法制與夫陶鎔社會鼓吹人羣組織行政自治之機關增進信教強種之幸福無一不視建設爲定率建設者即佛云莊嚴地獄是也時世造英雄英雄造時世而建設之事起焉固不僅一鄉一邑爲然也吾邑在上古之世民族歷史遠不可稽其爲榛榛狉狉與葛天無懷人民殆無以異自楚蹻略地號稱滇國爲開疆拓土之

權輿漢代置縣降及有明相沿其制草萊漸闢聲教始通然其間棟蠶肇衅蒙舍稱雄吐蕃竊據段寶寇邊數千百年間兵連禍結依然與部落時代無殊也明代流寓極多開化速率颺赴響臻近今數十年文明輸灌直甲全滇曩昔墾邊經野廣土殖民築城鑿池分塘置汎與夫關哨津梁之佈列陸航郵電之交通殫竭精慮規畫始終更幾經六詔戰雲歷朝血史羌夷髡髽漢族腦肝以爲得此現狀之代價其締造不可謂不難邇者民國成立矣舉滿清時之稗政秕俗一掃而空有大破壞卽有大建設以後吾邑之安危治亂強弱存亡則亦視今日之建設何如耳嗟嗟運會之遷流靡定滄桑之

變幻無常廿世風雲急如流矢茫茫大陸罔識終極更豈獨一鄉一邑爲然耶志建設

沿革

上世時期之沿革 周顯王時楚威王使將軍莊蹻將兵循江上略巴蜀黔中以西遂以其衆王滇莊蹻者楚莊王苗裔也蹻至滇以兵威略定屬楚欲歸報會秦司馬錯攻楚黔中道塞因以其衆王滇變服從其俗以長之滇考蹻使部將小卜收滇西諸蠻旣不得歸始築苴蘭城居之秦始皇時使嘗頌略通五尺道立黔中郡置守尉監黔中郡兼夜郎地今曲靖猶是夜郎境當時或亦置吏再西則莊氏

所長原未入秦漢書曰頗置吏焉頗差多也言有無不一也此西南郡縣之始按三代之世越裳獻龜卜人貢砂其時西南夷固純全爲部落時代也至楚蹇王滇秦皇置吏一進爲封建時代再進爲郡縣時代矣吾邑僻處遐荒自唐及秦二千年間土地人民尙無專一名稱可指建設沿革更遠莫能稽蓋統隸於西南夷也

中世時期之沿革 漢武帝元封二年遣將軍郭昌衛廣平西南夷未服者滇王降賜王印以其地爲益州郡置葉榆縣東漢葉榆縣屬永昌郡蜀漢屬建寧郡分置雲南郡晉仍稱葉榆縣屬雲南郡兼置寧州統之永嘉中改屬東河陽郡

宋屬河陽郡齊屬西河郡仍爲葉榆縣

隋屬南寧州

唐爲羈縻巨州地亦謂之昆瀾武德四年昆瀾遣使內附唐書昆瀾卽漢之昆明在爨蠻西以西洱河爲境貞觀三年改設匡州領勃弄匡州二縣大勃弄小勃弄西與黃瓜葉榆西洱河接天寶以後沒於南詔南詔設十賧苴羊賧賧謂州也卽縣境又名羊賧尋改國號大理

後梁鄭買嗣據爲大長和國後唐趙善政據爲大天興國後晉楊干貞據爲大義寧國晉漢周宋段氏據之仍號大理蒙古元立上中下三千戶所後罷中千戶所立錄事司上下

二千戶所併縣復陞爲理州尋改州爲縣曰太和有明因之弘治七年割太和縣九里雲南縣二里趙州一里地置賓川州太和區域因此徧小

近世時期之沿革 滿清因明制制仍爲太和縣附郭大理府城爲府領七屬奕訖咸豐丙辰大理回變是年八月城陷時提督文祥出師姚州未歸迺西道林廷禧被戕知府唐惇培遁走知縣毛玉成戰死於城西北隅回族擁立杜文秀設官分職略據迤西各府廳州縣因於各地方設參軍治民事蓋軍事時期以民刑訴訟統隸於軍事裁判也從此縣治淪沒者十七年載淳同治己巳省軍西上壬申攻克郡城仍設流官

規復舊制

按自漢代設治降及今茲一廢於南詔再廢於蠻三廢於回他如姑繪弄棟背叛無常沙賊杜回蔓延爲禍二千年間生靈塗炭兵燹流離輻輳繹繹罄竹難書迄今萬劫紅羊空餘瓦礫千年碧血徒吊松楸吁可鑒已

中華民國元年府縣治歸併以大理府長兼攝縣事

按世界公僕于役民事古今同揆中外合符滿清舊制親民者僅一有司耳督藩道府高擁位祿層層箝制勢如贅瘤所謂治官官多治民官少專制積成病國病民貽譏外族是則所宜歸併者又豈獨府縣治已耶

二年政府通令廢府廳州制改太和縣爲大理縣

開化起因 漢武帝元光五年以司馬相如持節入西犛至若水樸榆人張叔盛覽往從受學歸教鄉人

慎考張叔樸榆人天資穎出疾土俗不知書思變其俗聞相如至若人造梁距樸榆二百餘里負笈往從受經歸教鄉里盛覽字叔通亦樸榆人學賦於相如著賦心四卷相如曰合纂組以成文列錦繡而爲質一經一緯一宮一商此賦之迹也賦家之心包括宇宙總覽人物斯乃得之於內不可得而傳覽乃作合纂歌列錦賦二篇

漢元封元年中郎將司馬遷奉使南略邛笮昆明立講臺於

樸榆 滇雲歷年傳滇雲講學之始或曰司馬遷以武事西
征略涉滇境何暇學問談經且司馬遷亦不係道學之人舊
志雖有司馬講臺恐屬附會故今志刪之耳竊以爲不然司
馬氏未仕時亦曾講業齊魯觀孔子之遺風今得位行政懷
遠宣化尤當施教於殊方以被文德於無外况昆明乃今麗
江舊通安州地自邛笮至昆明必經樸榆又先已有受經學
賦如張盛二子之產於是鄉此可一變至道之邦也則其講
學之遺基有令人低徊留之而不能去者尙何疑其虛誕而
削其迹乎

大理名稱之由來 唐蒙氏吞滅五詔德宗興元二年閣羅鳳

孫異牟尋自稱日東王國號大禮

後晉高祖天福二年段思平自立國號大理

宋淳祐十二年蒙古遣太弟忽必烈攻克大理得五城八府

蠻部三十有七

置大理上下二萬戶府

蒙古至元七年置大理路軍民總管府

明太祖洪武十六年改大理路爲大理府領州四縣三長官

司一（四州有蒙化州而賓川未與焉）

太和名稱之由來 夷語以坡陀爲和在城中尊之曰太因以

名城嗣移名縣

廢縣地點

樸榆廢縣在縣東北東河陽廢縣亦在縣東

城市

太和故城

在縣南十五里卽今太和村唐開元末皮羅閣取

太和城遂徙居之其城周十餘里閣羅鳳亦竊據於此天寶

十三年劍南留後李宓擊南詔深入至太和城以糧盡引還

（城今廢）

羊苴咩城

卽今縣城唐貞元中異牟尋寇西川敗還懼築羊

苴咩城延袤十五里徙居之改號曰大理自是太和別爲一

城故城漸廢太和之名遂移於羊苴咩城 雲南記羊苴咩

城在點蒼中峰下卽古樸榆城也蠻語訛爲羊苴咩亦曰陽

咀咩城南距太和城十餘里貞元初異牟尋築此城七年西
川帥韋皋遣判官崔佐時至羊苴咩城說異牟尋使歸唐宋
時段氏據此亦謂之大理城

按羊苴咩城東西以山河爲界南順龍溪北河沿北順桃
溪南河沿由西而東至今城基猶有存者若大理城係明
洪武時建築其規模之縮小什一而已非遺趾也

洱海衛城 明太祖洪武十六年設大理洱海二衛指揮司二
十年築洱海衛城今廢

史城 在縣北四十里隋開皇中爨澹旣降復叛史萬歲討之
入南中過諸葛武侯記功碑渡西洱河此具駐師處也唐大

歷十四年異牟尋立功遷史城貞元初始改築羊苴咩城
滇記史城卽太和縣喜洲驗元初嘗置喜洲旋廢蓋譌史爲
喜也（城今廢）

大燈城 唐玄宗開元二十六年劍南節度使王昱納皮羅閣
■爲奏請合五詔爲一上許之五詔遂滅皮羅閣因逐西洱河
蠻取太和城又襲大燈城守之盡有雲南之地（大燈城卽
今喜洲城今廢）

九重城 在縣境九重猶言九城志云南詔境內有九重城皆
備土番而設一在河尾里一在關邑里一在北回一在蟠溪
里一在塔橋一在摩用其二城則羊苴咩城太和城史城也

今廢

金剛城

在點蒼山佛頂峰麓亦南詔所築今廢

今城建築暨增廣重脩始末

大理城一名紫城又名榆明

洪武十五年大理衛指揮使周能建築明年都督馮誠率指揮使鄭祥廣而闊之展築東南二面四門各有樓南門曰承恩東門曰通海西門曰蒼山北門曰安遠

滿清玄燁康熙初年提督張國柱知府萬邦和重脩三十一年提督諾穆圖捐資遣太和縣知縣張泰交撤四門樓新之改東門曰永清西門曰永鎮此後有無重脩因奕訢咸豐六年回變各衙署被燬檔案無存無憑查考載淳同治十一年

官軍攻城開掘地道東南兩方轟塌三百餘丈十二年巡撫岑毓英就地籌款脩理光緒三年東南城垣坍塌五十餘丈經知縣曹廷銓州判汪啟源請款興脩七年提督黃武賢迤西道熊昭鏡知府鄧華熙知縣張曾亮請款重脩南門外城樓東門城樓八年新脩東門近左城垣坍塌十七丈二尺經知縣吳申祐請款重脩二十九年知縣李慶恩請款重修

形勢 今城高二丈四尺磚表石裏上置敵樓十五座鋪三十九所（今廢）周圍七里三分垛口一千四百八十個越牆垛口八十個統計壹千伍百陸拾個東門名洱海西門名蒼山南門名雙鶴北門名三塔四門城樓各高二丈二尺寬四丈

八尺四隅爲角樓（今廢）池闊四丈深八尺今多被鄰田侵佔

方位 今城如平方形在點蒼中和龍泉兩峰麓東距西洱河六里北距上關七十里南距下關三十里向指北偏西十五度

特別市暨諸小市 三月大市在城西校場每歲以三月十五日集至二十日止各省及藏緬商賈爭集官署遣戍卒衛之俗稱唐永徽間有觀音大士者以是日入大理四方之人聞風而來各挾其貨因而成市亦曰觀音市云

附規定觀音市地點內陸軍墓地簡章並事由